

尚

書

辨

解

尚書辨解卷五

金縢

金縢屬。縢猶閉也。古者卜筮之書用犢藏。加鍵閉曰金縢。卜則啟。既卜以其祝冊與所得兆辭併藏之。昔武王有疾。周公卜請代史藏其冊于匱。其後成王以管叔流言疑公。公避謗居東。天大風雷。王啟匱。卜得公前冊感悟。迎公歸。史記其事。命曰金縢。序謂周公自作。非也。如公自作。則請代與藏冊皆私意矣。學者讀金縢。但當思聖人忠孝誠敬迫切至情而不必奇其事。如謂武王疾愈。果以周公之請。愚不敢知脩短。

自然未可以請代免也。如謂風雷之變，天果欲啟金
縢之冊，愚亦不敢知。天何心？未必爲金縢風雷也。武
王無周公之請，亦必不死。成王不因風雷之變，則未
肯悟聖人精誠之極，適與事會。易所謂盡性以至于
命也。方其迫切請代，惟知臣爲君死，何暇計事之有
無而藏冊金縢亦何期？後日見知仁孝誠敬，惟自盡
其心，至于受命如嚮，莫之致而至，命也夫。

既克商二年，王有疾，弗豫。二公曰：「我其爲王。」穆卜，周公
曰：「未可以戚我先王。」公乃自以爲功，爲三壇同墠。舊爲
壇於南方，北面。周公立焉，植璧秉珪，乃告大王、王季、文

王

克商後二年卽訪箕子洪範之年弗豫弗悅也二公
太公召公也穆卜猶敬卜戚憂也功事也自以爲功
言辭二公自以爲事父兄有急于弟之事也累土爲
壇除地爲壇三壇皆北方南面三王之位也一壇獨
南方北向公自立之位也植置也珪璧所以禮神
史乃冊祝曰惟爾元孫某遘厲虐疾若爾三王是有丕
背子之責于天以旦代某之身予仁若考能多材多藝
能事鬼神乃元孫不若旦多材多藝不能事鬼神乃命
于帝庭敷佑四方用能定爾子孫于下地四方之民罔

不祗畏。嗚呼。無墜天之降寶命。我先王亦未有依歸。今我卽命于元龜。爾之許我。我其以璧與珪歸。俟爾命。爾不許我。我乃屏璧與珪。

冊祝版也。元孫指武王。某武王名。史臣諱言也。遘厲遇災也。虐疾重疾也。三王大王王季文王也。若揣度之辭。不背通史記作負言。武王之病。或是三王負天之子。天責償旦亦三王子。請以旦代。蓋上帝左右必善承順。多材藝奔走服事鬼神者。乃可王。皆不如旦。至于奉命帝庭。以敷化助民安定。三王子孫使民敬畏。旦又皆不如王。故可相代也。當今人心新附四方。

未定俾王無恙以不墜天之降重命我三王之祀亦
永有依歸矣卽就也命三王之命旣祝乃就卜聽命
許謂疾瘳也以璧珪歸俟命待疾瘳以事神也屏璧
與珪蓋憾辭謂三王若不許則武王不生周家四方
未定七廟未有主珪璧將焉用所以屏棄也此見聖
人迫切至情子孫告祖父語直事死如生也

乃卜三龜一習吉啟籥見書乃并是吉公曰體王其罔
害予小子新命于三王惟未終是圖茲攸俟能念予一
人公歸乃納冊于金縢之匱中王翼日乃瘳

卜三龜歷問三王也一習吉者三龜一同重習吉善

也。籥，鑰通管鑰以開鎖鍵者。啟，開也。以籥開金滕，視卜兆之書三兆辭皆吉也。體，卜兆之體。詩曰：爾卜爾筮，體無咎言。公謂據此兆體，王其無害予小子。公自謂新命于三王，惟永終是圖。言三王許已代王終也。茲攸俟言安以待命。卽祝辭所云歸俟爾命也能念予一人言舍武王也。公歸，史臣記公既卜，遂歸俟命也。乃納冊于金滕之匱中者，卜史自收其祝冊與所得卜兆并藏之匱中。蓋古者有大事，既卜得兆必錄其兆辭與龜同藏。周禮占人之職，凡卜筮既事則繫幣以比其命。歲終計其占之中否是也。啟書藏冊皆

卜人常司非此冊獨藏亦非待公命而後藏也翼日
卜之明日凡今日前後皆謂翼日猶言挾日如鳥之
有兩翼也瘳疾愈也

人死可以代免乎曰否然則周公爲之何也臣子迫
切至情猶之病而請禱非鬼能療也死而求復非復
能返也情窮計迫無復之矣詩云如可贖兮人百其
身此之謂也然則歸俟命何也曰聖人誠信之至請
代則恨不卽代矣

武王旣喪管叔及其羣弟乃流言於國曰公將不利於
孺子周公乃告二公曰我之弗辟避我無以告我先王

周公居東二年則罪人斯得于後公乃爲詩以貽王名之曰鴟鴞王亦未敢誚公

武王克商後七年崩蓋周公卜金縢之後又五年也武王年八十生成王成王立年十有三周公爲相管叔者武王弟周公兄其羣弟蔡叔鮮霍叔度也初武王誅紂封其子武庚祿父于商使管叔監之及武王崩管叔以商歷兄終弟及謀作亂畏周公在內乃與羣弟爲反間流言于國曰周公將不利于孺子以蠱成王凡言不知其所自起之謂流國西京玉國也孺子謂成王不利謂將篡位周公告于太公召公曰人

言如此我不可不避辟與避同謂去位也詩云公孫碩膚孫卽避也我無以告我先王言若有變則已將無以自白于祖考也東謂殷土管叔監殷在東周京在西謂中原爲東也是時成王因流言疑公公處此唯有去位不然內疑而外叛禍將大所謂無以告我先王者公之慮遠矣然去不之他之東何也東方初定人情叵測公知流言自東來有變必以西討爲名不若因而就之果事由管叔則以兄弟之誼感之變起可親察其情形諺云百聞不如一見詩云鴻飛遵渚公歸無所卽此行也其居東二年何也王疑久未

釋也則罪人斯得謂管叔始伏辜也公初至東管叔
謀阻而終不肯改步明年將以殷叛成王覺使人執
而殺之故曰罪人斯得罪人卽管叔也不曰討而曰
得不用師以計得也誰得之王與二公得之公不知
乎曰不知也公居東叔叛王疑公黨叔故取叔必不
使公知公知亦不敢爲叔請進無以白于王退無以
解于兄管叔所以默然被戮公所以默然沈痛不能
伸一臂之力于後公知而乃作鴟鴞之詩貽王也鴟
鴞見幽風然史不稱叔稱罪人何也叛故曰罪人孟
子云管叔以殷叛朝廷以叛殺罪人非以流言殺叔

也何以知之以王不悟知之何以知王不悟得鴟鴞之詩猶不悔也欲誚讓公而未敢耳如王以流言殺叔自知公無罪矣何待風雷啓金縢然後悟邪惟王不悟故殺叔不以流言以叛也以叛爲罪則以流言爲忠以叛爲罪知叔之當討以流言爲忠不察公之無辜甚矣成王之蔽于讒也蓋流言初不知所起公知而不言及公居東久管叔旣以叛誅而王尚不悟流言之卽叔也使元宰淹恤在外故史臣記罪人斯得于公居東之年以正叔之罪以舒公之冤卽詩云蒼天蒼天豈不爾受旣其汝遷之意世儒不達誤謂

公以流言得叔嗟夫古人立木求謗聞謗動色卽非
聖人況口舌風聞殺兄自明視管叔所爲賢不肖之
相去其間不能以寸也或曰何據而知其非公得邪
曰公得必以師是世儒所謂東征也時成王方以流
言疑公公欲出師則必請請則王必不從不請獨行
則王愈疑人謂已不利而又專制興師是救焚益薪
也故當時聞謗不辨輒自引避處憂患而巽以行權
非聖人不能豈有倉皇東征之事乎東征之說由漢
儒誤解我之弗辟爲刑辟孔書承訛僞撰蔡仲之命
謂公以流言致辟管叔囚蔡叔其說緣飾于春秋傳

衛祝佗云管叔啟商。甚間王室。王殺管叔。蔡蔡叔以車七乘。徒七十人。其子蔡仲。改行率德。周公舉爲已卿士。見諸王而命以蔡。此言成王殺管叔。周公不能救而推恩其子。始末甚明。杜元凱釋之云。周公以王命殺之。將爲公文殺兄之過。而不知公本未嘗殺兄也。據孔書爲辟叔。而不知孔書後人僞增也。詩詠東山。破斧缺斨。是爲東征。在成王悔悟迎公歸之明年。非居東之二年也。爲討武庚祿父。非討管叔也。爲黜商命。非爲流言也。是時罪人已得。管叔已死。序謂將黜殷。作大誥。既黜殷。殺武庚。是也。故書大誥後金縢。

詩東山後鴟鴞編次正同世儒誤以居東爲東征不思書記居東二年詩誅東征三年也又以大誥爲討管叔今大誥在何嘗一字及管蔡曖昧片語奚損盛德而擅興師旅甘心同氣兄弟之惡不過閱牆而羽檄星馳播告四方豈聖人所爲況聞謗之初旣不忍累兄自白避位之後又豈肯因謗殺兄學者窮經此何等事可以不辨旣厚誣公矣乃詭稱大義滅親援湯武放殺爲解夫湯武放殺無地可避公一避而心迹昭然桀紂負天下天下棄之兄雖負弟第詎忍棄兄常棣一歌千古含悽七月鴟鴞皆爲傷兄作大誥

康誥垂泣而語無逸戒譱張亂殺立政教敬爾由獄
詩云鼠思泣血無言不疾公蓋終身未忘于管叔之
死也豈其旣殺兄而呻恫至此極乎孟子之書最爲
近古陳賈問孟子曰周公使管叔監殷管叔以殷叛
有諸孟子曰然陳賈曰知而使之是不仁不知而使
之是不智孟子曰周公弟也管叔兄也周公之過不
宜乎皆言公失于使兄耳若更有殺兄之事陳賈巧
詆豈不盡言而孟子又豈直以誤使爲過不知誤使
猶爲過況其殺之豈但過而已邪故愚嘗竊幸公所
以得免于殺兄成王二公所以能取罪人如反掌者

正唯以公居東一行耳。使公聞謗不早避，避不卽東。管叔之叛，何待二年？旦夕率紂子倒戈西向公，于此時欲避不及，欲不與于殺叔，不可得矣。惟其聞言卽去，不利之謗自解去，而居東反側之謀坐銷。是以管叔之叛遲至二年之後。東方情形悉于居東之久。公在外，二公在內，罪人束手，社稷晏然。而公亦賴以免于推刃同氣之慘。此其應變精密，幾事能權，豈尋常思慮可到。當世疑公殺兄亦以是耳。嘗觀虞舜愛弟，周公愛兄，同也。舜寧不有天下而不忍亡弟，公寧不有冢宰而不忍亡兄，其志同也。顧舜爲人主力可曲。

全而公爲人臣勢不能兼此家庭之變舜慘于公而
遇主之知公不及舜舜所以卒能容弟而公卒不能
救兄今古遭逢有幸不幸哉孔子贊公曰不驕不吝
詩人詠公曰公孫碩膚赤舄几几自古大臣功高謙
冲未有如公者東征屢出王幼必奉以行一訓一誥
必稱王命雖尊居叔父貴爲冢宰而鞠躬盡瘁身先
百辟流言蔽主一辭不辨而引咎待命故其自矢曰
作周孚先可不謂萬世人臣之師表與必如世儒誣
公負辰明堂朝諸侯流言殺兄此其暴戾衡行何異
莽操鄉原不爲而謂聖人爲之乎世儒又有疑金縢

非古者嗟夫不有金縢公之冤不白于後世矣其曰
我之弗辟無以見我先王傳寫聖人心跡曠世如見
曰公居東二年則罪人斯得立言有體紀時紀事可
徵可信爲千古尚論公案後人得據此以折服好事
之口作史之功于斯爲大世儒不察孔書爲妄作顧
謂金縢爲可疑愚嘗咽千古少讀書人非誑語也
秋大熟未穫天大雷電以風禾盡偃大木斯拔邦人大
恐王與大夫盡弁以啟金縢之書乃得周公所自以爲
功代武王之說二公及王乃問諸史與百執事對曰信
噫句公命我勿敢言王執書以泣曰其勿穆卜昔公勤

勞王家惟予冲人弗及知今天動威以彰周公之德惟
朕小子其新逆我國家禮亦宜之王出郊天乃雨反風
禾則盡起二公命邦人凡大木所偃盡起而築之歲則
大熟

秋卽得罪人之年之秋公居東之二年也弁禮冠啟
金縢之書將以卜也得周公向所辭二公自爲之事
蓋請代之事二公亦不知也諸史卽諸卜人也對卜
史對也信實有也噫歎辭言實有此事公命我勿與
人言蓋祈禱事秘言則褻鬼神且不欲武王與在廷
諸臣知非逆料其有他日之事也王言勿穆卜者知

天變以公不必卜也念公欲代兄死而況肯奪兄子之位乎故執書泣悔之至也冲幼也新逆先儒謂當作親逆王欲親往迎公歸感之至也詩伐柯詠娶妻諷王親迎以此一時天人震動廷臣有請王親往東土迎公者故詩書并記之王言亦禮所宜然未果親往也詩歌九戩但以上公之服迎公亦未言王親行也王出郊以天變告于郊因遣使迎公出送示親迎之意也禾盡起言不傷也按是時太公爲大師召公爲大保心知流言之誣而不早爲王言何也蓋周公所以處此者極盡其道無容于言之也公之避位非

徒自靖亦以善成王也。成王以幼冲之年過聽讒邪，使老成不敢言，元宰不得關其忠，罪人誅而不悟，鵠鵲貽而不悔，豈非好察多疑之主與漫濶之譖其入方深而元老同辭其跡似黨，惟有退避之誠感之從容俟之彼將自動動則其悔必深，若強諫過激猜疑四起，讒險在外人心動搖，周之兄弟同姓五十餘國其孰非覬覦者，變且不測，故惟有去。二公與諸臣居中自可無憂，卒使成王一悔悟徹終身，夫非公之善處曲成之與。

大誥

周公以管叔流言避位居東二年管叔叛成王執而誅之公傷之爲作鳴鵒是時紂子武庚猶在東也及成王感風雷之變迎公歸東方徐奄諸國又以武庚叛公乃大誥天下奉王東征爲討武庚平徐奄也時管叔已死故曰天降威知我國有疵又曰我有大艱于西土西土人亦不靜卽指管叔之事詩云周公東征又云自我不見于今三年孟子謂周公伐奄三年討其君滅國五十卽此行也或曰管叔旣誅紂子不亦可舍乎曰否孽由紂子管叔死紂子安得獨生公

賦鴟鶚傷其取我子視武庚已爲不共之讐矣朱元
晦誤以此行爲討管蔡且疑其辭緩不切徒歸重卜
筮嗟乎惟此可以諒武王周公之心武王苟欲黜殷
殄紂子豈待牧野後惟其欲存之故處以舊都及管
叔叛徐奄又叛雖欲存之而不可得矣蓋武王受命
晚周京僻在西隅朝歌以東薄海五十餘國尚觀望
二主間武庚若在天下終未可平但殺其父而又殄
其子人其謂何徐奄方以興復爲名故不得不折之
以卜示之以天意而推本于武王夫殷之亡周之興
皆天也武王伐商故周興今王不黜殷則周亡先王

始之今王不得不終之全商而欲安天下無兩利之策此當世不得已之勢安危一定之理以爲緩而不切特未之思耳是以武庚誅微子卽封公不忍亡殷之仁不得不黜殷之義反覆其辭聖人之情可深思不可言傳也昔紂無道人心欲亡紂故牧誓之辭簡而直今商亡人心思舊故大誥之辭詳而婉聖人于此真有所不得已焉耳嗟夫紂子猶不忍而況于兄乎

王若曰猷大誥爾多邦越爾御事弗弔天降割于我家不少延洪惟我幼冲人嗣無疆大歷服弗造哲迪民康

知曰其有能格知天命已予惟小子若涉淵水予惟往求朕攸濟敷貴敷前人受命茲不忘大功予不敢閉于天降威

王若曰者周公代爲成王言也是時王年十五而公奉王東征多士所謂昔朕來自奄是也篇中凡言小子冲人皆王自稱雖成王之命皆周公之志也猷圖也謫謀之辭或曰語辭越於也乎憂閔也詩云不弔昊天言爾多邦不弔閔乎割害也不少延傷武王速崩也洪大也嗣君所任大也歷曆數也服行也造至也迪猶訓也言年幼嗣統行不能造于明哲以訓迪

案民而況能格天知命乎已予者自後之辭渡水曰
涉既渡曰濟敷布也賁光也敷賁敷言布先德而光
布之也敷賁而曰敷賁敷猶今蠶而曰今蠶今厥逸
而曰逸厥逸恆言多類此天降威言武庚不靖天威
伐之我不敢閉蓋武王誅紂而存其子聖人之本願
也天下初定主少國危反者四起則殷嗣不得不殄
天寶爲之是以大告發端傷天降割不少延聖人之
心大不得已焉耳

用寧王遺我大寶龜紹天明句卽命句曰有大艱于西
上西土人亦不靜越茲蠶殷小腆誕敢紀其敘天降威

知我國有疵民不康曰予復反鄙我周邦今蠶今翼日
民獻有十夫予翼以于敕米寧武圖功我有大事休朕
卜并吉肆予告我友邦君越尹氏庶士御事曰予得吉
卜予惟以爾庶邦于伐殷逋播臣爾庶邦君越庶士御
事罔不反曰艱大民不靜亦惟在王宮邦君室越予小
子考翼不可征王害易不違卜

承上言天命而決之卜也寧王武王也武王安定天
下故曰寧王大寶龜武王卜伐商之龜今以上東征
明東征武王志也紹猶紹介之紹天有明命因龜受
命故曰紹天明卽命與金縢卽命于元龜之卽命同

就卜聽命也。曰兆辭也。西土周也。有大艱于西土。言東人有謀周者。謂武庚也。西土亦不靜。言我周室之人。亦有不安靜。與之同謀者。謂管叔與羣叔也。卜兆如此。是寧王明示我以當討。蓋吉兆也。于今蠢然無知之殷。小厚之國耳。乃敢違我無疆大歷。紀續其旣絕之緒。乘我西土不靜。國有疵病。民不安康。而曰予將復興。反卑鄙我周邦。今殷乃蠢如今日乎。怪而嘆之也。翼日猶昔日。武王伐紂之日也。凡今日前後皆謂翼日。如鳥之有兩翼也。顧命延入翼室。亦謂兩夾室也。民獻人賢也。十夫卽十亂也。翼輔也。于往也。救

撫也言昔日有民賢十人爲我輔翼伐商以往撫安其民贊武王圖功我有大事休美我卜并吉無有不驗者龜之可信如此今予以所得大艱西土之兆告我友邦君輩曰予得吉卜將以爾庶邦往伐殷逋逃播越之臣而爾友謂兆所云艱大民不靜惟在王宮庭與諸侯之同室者不在四方異姓也蓋是時管叔既誅金縢所謂罪人斯得而公又興師東征人或言罪不在武庚故公體羣情而告諭之如此考翼不可征言考之十夫翼武王之事如商不可征則當日武王曷不違卜而必于伐紂乎寧王旣不能違卜于昔

小子又安敢違卜于今蓋公意有隱而難言者管叔
之死武庚陷之子弟于父兄之讐一也紂囚西伯而
武王有牧野之事紂子禍管叔而周公有黜殷之舉
殺人之父人亦殺其父殺人之兄人亦殺其兄西土
人不靖者旣伏其辜而人之大艱我西土者容可追
平公之此舉其深有嘆于管叔之死也二千餘年來
承訛不察使公冒殺兄之名識者恨之後之君子諒
同此心耳

肆予冲人永思艱曰嗚呼允蠡鰥寡哀哉予造天役遺
大投艱于朕身越予冲人不卬昂自恤義爾邦君越爾

多士尹氏御事綏予曰無恙于恤不可不成乃寧考圖
功已予惟小子不敢替上帝命天休于寧王與我小邦
周寧王惟卜用克綏受茲命今天其相民矧亦惟卜用
嗚呼天明畏弼我不丕基

此再告也肆猶遂也予冲人王自謂也未思大艱之
卜而曰信哉殷之蠶也自作不靖禍延鰥寡可不哀
哉予之造于此皆天實役之遺此重大投此艱難于
我身予雖幼冲不我自恤卬我也爾等干義當念其
艱大而安我曰勿畏于恤不可不成就爾考寧王所
圖之功恐畏也寧考猶言寧王寧人皆指武王予小

子王自稱言今討武庚乃上帝之命我不敢廢昔寧
王伐紂惟卜是用故能安受天命今討武庚天助我
民況亦惟卜是用豈得替上帝違寧王而獨不用卜
乎不詳告殷所以當黜蓋聖人有難言之情而但託
諸卜以通衆志耳嗚呼者信而嘆之之辭言天之明
威將弼助我周邦丕丕莫大之基所謂無疆大歷也
○恆情好信惟鬼神武王伐紂以卜吉克衆所傾信
也今卽武王所遺之龜卜黜殷之事其兆又吉前作
後承事同一體此舉惟以勉卒先猷故借卜以承先
志非專倚卜也詩云我龍受之矯矯王之造載用有

尚書新解 卷三
嗣實維爾公允師此之謂也

王曰爾惟舊人爾丕克遠省爾知寧王若勤哉天閔嗟
我成功所予不敢不極卒寧王圖事肆予大化誘我友
邦君天棐忱辭其考我民予曷其不于前寧人圖功攸
終天亦惟用勤嗟我民若有疾予曷敢不于前寧人攸
受休畢

此三告也爾指邦君諸臣舊人卽十亂也舊臣豈不
知舊事遠省武王創業之勤則知後人當善成也閔
嗟戒警意成功所在卽大艱處也天將以
大艱警懼于今日成功之所予不敢不極力以卒寧

王所圖之事故我大開化勸誘我友邦君天匪有忱
信之言其稽考我民而已。渠匪通猶詩云天難忱斯
也。今兆有吉辭而鰥寡哀哉天意可知。予曷不于前
寧人圖其功之所終乎。天以大艱勤勞畏蒞我民如
有疾痛予曷敢不于前寧人所受休美而畢成之乎。
寧人卽寧王今日之舉皆終武王之事非得已不已
也。

王曰若昔朕其逝朕言艱日思若考作室旣底法厥子
乃弗肯堂矧肯構厥父。菑厥子乃弗肯播矧肯穫厥考
翼其肯曰予有後弗棄基肆予曷敢不越卬救寧王大

命若兄考乃有友伐厥子民養其勸弗救

此四告也若順也昔指武王昔伐商也逃往也朕其
逃言已亦欲嗣往事也我嘗誦大艱之兆日自思惟
如人父作室既底定成法其子乃不肯築堂基況肯
結構成室又如治田父既芟闢其子乃弗肯播種況
肯求收穫其子怠惰如此其父欲輔翼肯曰予有後
嗣弗廢棄基業乎必惡其子而不欲輔翼之明矣故
今我不敢不干我身撫循寧王之大命如有弟予兄
既考終乃有朋友侵伐兄子其弟以民當安養勸止
不救是豈人情則其當往救朋矣吁公言及此惕然

有冲人之慮慘然有兄弟之懷其自責深矣武庚所以卒不見貫也

王曰嗚呼肆哉爾庶邦君越爾御事爽邦由哲亦惟十人迪知上帝命越天棐忱爾時罔敢易法矧今天降戾于周邦惟大艱人誕鄰胥伐于厥室爾亦不知天命不易

五告也肆陳也肆哉勉以盡力也論語曰陳力就列
爽明也言通達國事必由明哲亦惟亂臣十人啟知
天命爾時牧野之事上帝臨汝猶謂天命匪忱不敢
慢易其法則所謂勿貳爾心也況今天降災戾武王

已崩人有大艱于我西土者與之爲鄰而我西土人
又自相伐于室天命之不易甚矣爾尚不知乎何今
昔之不相侔也誕乃也

予永念曰天惟喪殷若穡夫予曷敢不終朕畝天亦惟
休于前寧人予曷其極卜敢弗于從率寧人有指疆土
矧今卜并吉肆朕誕以爾東征天命不僭卜陳惟若茲
六告也言已深思周之於殷如穡人之治田芟夷不
盡難以望歲何敢不終畝盡治天亦惟休美于前寧
人我曷其極至之卜敢弗于從乎寧人有指示我木
艱于西土我當率循有指之疆土謂殷以東及徐奄

五十國也。況今卜兆并吉，我以爾東征，天命不差。武
寧王大寶龜所卜陳若此，夫復何疑？蓋殷周不兩存，
興衰之大勢也。武庚若在，則反側未已；管叔死而武
庚存，非法也。此意難于播告，但言成就先業，不得不
東征而天下大勢已曉然于言外。凡聖人告戒不盡
其辭，更端反覆使人深思。易云：重巽申命，此之謂也。
是以盤庚大誥迴波宛轉，學者病其詰屈煩複，而聖
人隱微之情正寄乎此。千載而下，想其上下相譎，不
激不迫之情，當世所以神受嘿喻也。然必歸本于卜
何也？古人千衆志難通，羣言不齊，則借鬼神通之，假

卜筮齊之鬼神無心卜筮無心聖人亦無心因至公
以明至公所以決疑成謀之微權也夫古聖人作卜
筮通易之變非教人全仗之其用卜筮以通衆志亦
非已全仗之惟有聖人先覺然後可命著龜亦惟古
人心術醇然後著龜應豈著龜靈人心之靈與聖人
之靈也後世人主德不脩政不舉事幾惶惑已志不
蔽僉謀不同卿士庶人不協徒倚枯骨朽草巫史聒
聒牀下而緯稗邪說附合慙慙以望嚮應豈不謬乎
世道交喪久矣人自愚昧著蔡卽有寶龜神策
命之不從雖箕

大誥如此人心何故漢

唐以後龜策廢而不講好事之徒作爲讖緯符命自稱彰往知來惑世誣民大亂滋起不可謂非卜筮作俑而聖人亦初不意其濫觴至此極也是以孔子中庸之教不語鬼神唯告之以可知可行其贊易也不主卜筮慮深遠而見明灼真所謂生民以來未有者尤讀大誥所當知

康誥

康誥酒誥梓材皆周公所以告康叔也康叔名封武王同母弟初武王伐商誅紂以其地封管叔及羣叔監紂子武庚治殷封康叔于康亦殷土也後數年武王崩東方反者數起成王旣誅管叔周公奉王東征討武庚盡有殷地以其半封微子嗣殷爲宋以半益封康叔爲衛晉牧伯官兼司寇監于東土遂相洛營東都蓋周先王十五世皆居西文王有二亦惟西南諸州自冀以東薄淮海青徐猶殷土也東西相距五千里武王伐商止及朝歌自朝歌東惟知有紂子徐

奄五十國皆挾以叛而西京遠不相及周公居東二年悉其情形計紂子在則反側未已徐淮諸國不大創則遠人不威東都不建則天下之勢偏安三大事舉而後天下可定故歸卽奉主東征還相洛會諸侯升康叔爲伯作此告之亦所以告東諸侯也然辭稱武王何也凡周公所爲勤勞天下之事莫非武王之事也故大誥則稱寧王詩書所載周公制作靡不稱先德聖人仁孝之至而況封爵尤非臣子所專古爵入于祖而康叔以諸父冲人未宜致訓公人臣無制命禮兄弟之國封自武王故辭必稱武王也雖然公

有難言之隱。管叔之死。天倫大變。公在外朝廷殺叔。公不能救。故賦鴟鴞曰。既取我子。恩斯勤斯。育子閔斯。大誥曰。若兄考。有友伐厥子。民養其勸。弗救。今康誥亦曰。弟弗念天顯。兄亦不念鞠子哀。無逸曰。人或譸張爲幻。不寬綽厥心。亂殺無辜。無言不痛。蓋有憾于王之率殺。而或者康叔初亦與聞之。故奉皇考之訓。動以一本之思。使追念先德。共惇天顯。弘濟時艱。告叔又以告王也。子承父志。兄垂弟訓。事死如生。有不覺親縷之至者。聖人定大謀。仁孝爲本。故夫子贊曰。武王周公達孝。嗚呼。盡之矣。蓋管叔不肖。始于一

念不孝友子弟不孝友賢父兄之過不教而誅非聖
人之心周家十五世忠厚而突有管叔之事公所爲
拊心痛也故惓惓以孝友爲勸以率殺爲戒不直陳
己意但宣揚父兄之訓而說者不達謂編次在大誥
後不宜稱武王旣云朕其弟小子又云寡兄則不宜
屬成王又謂康叔武王弟則不當于成王時始封封
則不應專言刑罰事不知康叔受封在武王初年而
益地晉伯則成王也詩旄丘之葛序謂衛不能脩方
伯連帥之職史記衛世家稱伯木此其官兼司寇故
屢言刑罰亦深懲于王之殺管叔而致傲于司寇耳

是時東方騷動國無長君紂死子誅人情思舊隱憂
方深故託康叔心膺處之殷墟假以大權齊亂民不
得不威彊弗友剛克并用不悖也周之典章大抵出
周公手雖多士多方成王之命皆公之辭不獨三誥
也先儒謂爲武王作欲移置金縢前以篇首惟三月
至大誥治四十八字爲錯簡移置洛誥周公拜手稽
首上今以篇次考之洛成雖在七年而初基則自茲
始諸侯咸會故洪大誥非錯簡也若使武王尚在入
心懼服奄徐未敢動何至費辭若此今讀三誥憂患
懲忿之意宛然武王初封兄弟之國十五何獨于康

叔叟爾使東土當武王時早得牧伯如康叔者何至有管叔武庚之事說者不深思議改舊章非也惟三月哉生魄周公初基作新大邑于東國洛四方民大和句會侯甸男邦采衛百工播民和見士于周周公咸勤乃洪大誥治

周三月夏之正月蓋公東征還之明年孟春也據經公居東二年東征又三年此蓋成王之六年王在西京而公與召公東來相宅也哉始也月既望而光滅魄始生蓋三月十有六日也初基始謀基也新大邑卽東國也洛在洛水之汭也四方民大和謂武庚誅

徐奄定四方民心和集無復叛離也周制王畿千里
外五百里侯服又五百里甸服又五百里男邦又五
百里采服又五百里衛服去王畿三千里外復有蠻
夷鎮藩共九服茲所會者東都附近諸侯非必三千
里外盡至也百工百官也播民和播布德教調和民
心猶周禮正月之吉始和卽所謂洪大誥治也士殷
士東土初定士至者公皆虛已延接不辭勤勞卽史
所謂吐哺握髮下白屋者也是時康叔新益衛封爲
伯東方之事悉以委之公因諸侯咸在多士畢集乃
訓康叔以治民之道卽所謂播民和也此節史臣敘

作誥之由世儒謂爲錯簡非也

王若曰孟侯朕其弟小子封惟乃丕顯考文王克明德
慎罰不敢侮鰥寡庸庸祗祗威威顯民用肇造我區夏
越我一二邦以脩句我西土惟時怙冒聞于上帝帝休
天乃大命文王殪戎殷誕受厥命越厥邦厥民惟時敘
乃寡兄勗肆汝小子封在茲東土

周公洪大誥于洛以訓康叔成王幼冲未宜致訓公
以人臣代言不敢專制而兄弟之國分封自武王故
公述武王之志呼康叔告之亦示成王以承先之孝
也王若曰者若爲武王言也孟侯長侯也牧伯爲諸

侯之長封康叔名。文王嘗爲牧伯，明德以正己，慎罰以治人，用其可用，敬其可敬，威其當威，以顯示民。始事區內諸夏，及一二邦以脩。如戡黎伐崇之類，馴至于我西土，盡被怙冒。上帝休嘉，乃命殪滅大商。戎大也。天下之民是以敘理。寡兄武王自稱勗勉也。言我又能勉力不怠，故爾今得有茲東土。文考明德，愼罰之功不可忘也。此一節公述父德，代兄言發端，使康叔深念父兄而傾聽也。

王曰：嗚呼！封汝念哉！今民將在祗遘，乃文考紹聞衣德言，往敷求于殷先哲。王用保乂民，汝丕遠惟商考成人。

宅心知訓別求聞由古先哲王用康保民弘于天若德裕乃身不廢在王命

爲武王言再告也。通述也。衣服也。衣德猶所謂卑服。今治民將在敬述文王繼聞其衣德之言。如明德慎罰庸庸祗祗皆文考身所服德之訓言也。然義理無盡。汝居殷土當廣求殷先哲王所以保治民者可不遠思。商之老成人所以存心者。知其教訓又別求聞由商以前古先哲王所用康民者。以保安民而弘化于天。若爾能多識蓄德充裕乃身在王命亦可無廢墜矣。

王曰嗚呼小子封恫通瘵乃身敬哉天畏棗忱民情
大可見小人難保往盡乃心無康好逸豫乃其又民我
聞曰怨不在大亦不在小惠不惠懋不懋已汝惟小子
乃服惟弘王應保殷民亦惟助王宅天命作新民

三告也恫痛也瘵病也言當自儆惕如痛病在身棗
匪通天威匪信難測民情向背昭然可見小民之心
難于保留往盡乃心無安好逸樂乃所以治民也民
怨無大小在人君順與不順勉與不勉耳已猶後也
藐末之意亦語辭猶恆言之云却也前言終而承之
之辭服事也應順也詩曰應侯順德汝小子之事惟

在恢弘王化順應保安殷民亦惟助王安天命作興更新之民移風易俗是汝之事也

王曰嗚呼封敬朋乃罰人有小罪非眚乃惟終自作不典式爾有厥罪小乃不可不殺乃有大罪非終乃惟眚災適爾旣道極厥辜時乃不可殺

四告也此言制刑之意非用刑之例也刑以懲罪罪有故有誤誤者使之從新無路非制刑本意也有心爲惡者雖小必刑無心註誤者雖大必赦其要使民易惡遷善而已眚災也遇眚災非有心也終怙終也終于此而不改則有心矣典法也式猶用也自作不

法用意爲爾雖小不可不殺殺猶刑也謂不可赦非
卽斃之也非終言始誤也乃惟災眚適爾旣道極其
罪得其情是乃可憐憫不可殺也敬明乃罰當如是
王曰嗚呼封有敘時乃大明服惟民其敕懋和若有疾
惟民其畢棄咎若保赤子惟民其康乂非汝封刑人殺
人無或刑人殺人非汝封又曰剋蕤刑二人無或剋刑
人

五告也刑罰有敘而不亂是乃治理大明而人服民
乃知謹敕而勉于和順也去民之惡若已有疾則調
治得宜而民畢棄其咎矣保民如赤子則愛護必周

而民康治矣爾雖制刑殺之柄非汝刑殺之奉天討也無或以私意刑殺人其刑殺人非汝封也天也王又曰劓刵人五刑之輕者亦勿或以已意劓刵人可也截鼻曰劓截耳曰刵

王曰外事汝陳時臬司師茲殷罰有倫又曰要囚服念五六日至于旬時丕蔽要囚

六告也外事謂東土之事陳設也臬所以限制門者牧伯爲限制之司今之觀察亦稱臬司設是臬司所以師此殷民使刑罰有倫敘也要約也緣情比律約而合之謂之要囚卽獄辭也要約囚罪服膺思念至

五六日。或至旬。或至三月。然後乃決。丕不輕意。蔽斷也。觀于此言。公于王之殺管叔。真有遺憾矣。此以下言愈切而愈悲。所以託諸武王也。

王曰。汝陳時臬事。罰蔽殷彝。用其義刑。義殺。勿庸以次。汝封。乃汝盡遜。曰時敘。惟曰未有遜事。已。汝惟小子。未其有若汝封之心。朕心朕德。惟乃知。凡民自得罪。寇攘姦宄。殺越人于貨。譬斂不畏死。罔弗斃。除

七告也。臬事。臬司之事。謂刑法也。言罰斷殷民之常法。當酌天理人情用之。如所謂律設大法。禮順人情。謂之義刑。義殺也。如後世申韓之刑殺不義也。次遷

就也勿用遷就汝封之心卽使事事盡遜順于義雖
曰是敕汝勿自喜惟曰未有遜事如是而後不敢忽
耳人未有若汝封之心者善繼述之心也朕心者不
嗜殺之心也朕德者保乂斯民之德也嗟夫止殺安
民是武王未成之志不泯之心亦周公難言之曲衷
也體其意而告之誠切至矣東征之役武庚之誅豈
得已乎使人臣皆如管蔡則武王周公此心此德何
由而慰所以深致望于康叔也凡民自得罪以下舉
其自作不典者寇盜攘奪謀爲姦宄殺人顛越人以
取其財瞽強不畏死此等之人誰不愍然豈朕欲殺

之所謂朕德朕心惟汝知也。暨強也。慙也。怨也。

王曰：封元惡大慙。矧惟不孝不友，子弗祗服厥父事，大傷厥考心。于父不能字厥子，乃疾厥子。于弟弗念天顯，乃弗克恭厥兄。兄亦不念鞠子哀，大不友于弟。惟弔茲，不于我政人得罪。天惟與我民彝，大泯亂曰：乃其速由文王作罰，刑茲無赦。不率大夏，矧惟外庶，子訓人惟厥正人。越小臣諸節，乃別播敷，造民大譽。弗念弗庸，瘵厥君。時乃引惡。惟朕慙已。汝乃其速由茲義，率殺亦惟君。惟長不能厥家人。越厥小臣外正，惟威惟虐。大放王命，乃非德用乂。汝亦罔不克敬典，乃由裕民。惟文王之敬。

忌乃裕民曰我惟有及則予一人以懾

八告也承上言寇盜姦宄元惡之人大可怨恨汝尚
知朕心不忍殺之況惟是父子兄弟之間各有良心
乃不孝不友子弗敬行父之事大傷父心父亦不能
愛其子乃疾其子爲弟弗念天倫明顯弗能敬兄爲
兄者亦不念父母養子之哀大不順于弟鞠養育也
鴟鶚之詩云恩斯勤斯育子之閔斯正此意我惟弔
閔此人非于我政人得罪惟天所與我民之常道大
泯亂耳曰若此者汝其速由我文王止孝止慈兄友
弟恭之道作不孝不弟之罰刑犯此無赦以教戒之

不率者大擊之況外庶子之官本以訓人訓人者惟其能正人及小臣諸禮節皆當訓之而乃別播陳詭道欺世盜名弗肯念君弗肯效用惟逞己私以病其君如流言輩者是乃不能正人節人而引人爲惡也惟我怨之汝爲臬司其速由茲引惡之義一切連率而殺之乎亦惟汝爲君爲長不能惇行孝友齊其家人以及小臣外正惟威虐淫刑放棄王命夫乃有非德而可以治人者乎汝未有不克敬典常由刑殺而可以寬裕民者也其惟文王之能敬能畏乃能豈第作人寬裕其民耳汝如曰我惟有及勿吹求已甚乎

易近民則政之中道乃所謂朕心朕德予一人以悅也孔子曰親者無失其爲親及之謂也觀于此言公蓋深有憾于王之殺管叔而難于顯言也

王曰封爽惟民迪吉康句我時其惟殷先哲王德用康又民作求句矧今民罔迪不適不迪則罔政在厥邦

九告也爽明也明思所以啟迪斯民千古善安康惟殷先王德之可以康又民者是作求詩云世德作求謂作起敏求也云殷先哲王戒勿若紂也民無有攸迪而不適從者君不迪民則刑罰不中無政于其邦矣

王曰封予惟不可不監告汝德之說于罰之行今惟民不靜未戾厥心迪屢未同爽惟天其罰殛我我其不怨惟厥罪無在大亦無在多矧曰其尚顯聞于天

十告也監者監其失如下言今民不靜是也告汝以用德之說于用罰之行謂明德以慎刑也民不安靜心未戾止屢啟迪之而未肯同心者無他君德不脩天罰殛之又誰怨乎勿曰無罪罪豈必大必多但一事少差天監在茲況今罪尚顯聞于天平蓋深有憾于管叔之事而痛自懲愆也觀此節之意周公代言甚明若武王存曰自命康叔則此言皆無謂矣讀者

諍之

王曰嗚呼封豶哉無作怨勿用非謀非彛蔽時忱丕否
則敏德用康乃心顧乃德遠乃猷裕乃以民寧不汝瑕
殄

十一告也無作怨無作可怨之事淫刑濫罰斂民之
怨也非謀非彛謀爲非常不循理之事也蔽斷也凡
所謀所行一斷之以誠信之心不敢欺詐無此數者
則敏勉其德矣康乃心勿躁急也顧乃德常內省也
遠乃猷勿見小也如是則政寬民和永保長世不汝
瑕疵殄絕矣

王曰嗚呼肆汝小子封惟命不于常汝念哉無我殄享
句明乃服命高乃聽用康乂民

十二告也命天命也無我殄享者子孫永保則宗廟
不絕祀也服命所被服牧伯之命明思王所以爵命
之意也聽卑則過察居上而能高其聽則猷遠而見
大無急切之政有曠覽之明而可以安治其民矣

王若曰往哉封勿替敬句典聽朕告汝乃以殷民世享
十三告也典常也世享享其國也按善訓人者不在
辭之便便精誠不接利口炙轂聽者不給而言者易
盡聖人以精誠動物意滿語塞使人聽而思思而又

言言者不迫而聽者心惟浸潤涵育曉人于語言之
外易所謂重巽申命孔子所謂有餘不敢盡而後能
入人深也讀者疑其煩複豈爲知言者哉

酒誥

此亦周公承武王之志以告康叔也紂之亡天下也始于酗酒酗于酒則淫于色酗淫則無所不至於是

有陪克聚斂瓊室玉門之侈有深宮長夜男女倮逐之行於是有殺諫臣剔孕婦炮烙罪人諸凶暴之事其臣下效之沈湎廢政其民間化之荒淫成俗故酒之流禍亡國敗家不可不戒也或曰亡國之事多矣而特爲酒誥不已細乎曰否禍莫憐于傷心鎖邪次之君者天下人之主心者人主之主也雖有聰明醉則心狂顓蒙愚夫力不能舉鷺雛醉則狎虎豹跋者

不能歷康莊醉則越谿澗天下狂暴之事由常人作者少惟醉者作事無非狂暴何也其心喪也人心喪則死心喪則無所不爲心喪則教亦不悟失亦不悔酒之爲害至于此吁可畏也哉故飲酒者不必皆狂吾見狂愚之人未有不好飲者殞身喪家不必皆酒吾見縱飲之禍未有不至殞身喪家者始于旣醉不覺終遂大迷不反禍亂已成猶舉觴自快曰吾以忘憂滔滔者天下皆是故夫傷心之害莫如酒防心之害莫如遠酒醒則善言可入迷則聖人難化禹所以惡旨仲尼所以憂困詩書諄諄非無故也公繫易于

未濟終曰飲酒濡首有孚失是其作無逸亦歸于無
若紂之迷亂酗于酒而已矣蓋飲則愿者變而爲狂
不飲則躁者反而爲靜家之多事俗之侈靡未有不
由崇飲者勤儉之門守禮之家謹厚之士未見有荒
于酒者聖人之訓其切要也哉

王若曰明大命于妹邦乃穆考文王肇國在西土厥誥
毖庶邦庶士越少正御事朝夕曰祀茲酒惟天降命肇
我民惟元祀天降威我民用大亂喪德亦罔非酒惟行
越小大邦用喪亦罔非酒惟辜文王誥教小子有正有
事無彝酒越庶國飲惟祀德將無醉惟曰我民迪小子

惟土物愛厥心臧聰聽祖考之彝訓越小大德小子惟

王若曰周公若爲武王言也明大命者明示大教令也妹本作沫卽詩云沫之鄉矣衛朝歌之地紂所都也變沫言妹者少婦之稱幼昏之意紂飲酒昵婦人酗淫亡國故謂殷邦爲妹邦易歸妹天地不交而萬物不興其象曰君子以求終知蔽聖人所以示戒也醉者昏昧故明大命覺之穆考文王廟次爲穆武王則昭考也文王爲西伯故舉治西土事告之肇始也悲戒也言文王告戒庶邦諸臣朝夕惟曰祭祀方用

酒今世人以酒爲小物夫是物也能使天下後世無
知愚皆溺貽禍至昏心敗德亡國喪家非小物也始
爲事神灌獻之用惟天地祖宗能享之高年有德能
安之仁人孝子賢君能薦之其得則爲福祉失則爲
鴆毒豈非天命天威所係乎故古聖人始作酒是天
之降命以肇我民大祭也今人沈湎是天之降威也
我民用大亂喪德惟此酒之行小大邦喪亡亦惟此
酒之罪故文王告教爾後人有官政有職事無常于
酒及庶國飲酒惟于祭祀旅酬以德將扶無至于醉
文王惟曰我民各訓迪于孫耕田稼穡土物是惜勿

糜穀爲酒則事省用儉淡泊清心善所生也爲子孫者亦當聰耳聽祖父之常訓德無小大小子惟一視勿以飲酒爲小過不飲酒爲小德而不聽也

妹土嗣爾股肱純其藝黍稷奔走事厥考厥長肇牽車牛遠服賈古用孝養厥父母厥父母慶自洗腆致用酒庶士有正越庶伯君子其爾典聽朕教爾大克羞者惟君爾乃飲食醉飽丕惟曰爾克永觀省作稽中德爾尚克羞饋祀爾乃自介用逸茲乃允惟王正事之臣茲亦惟天若元德永不忘在王家

嗣爾股肱以下告民也庶士以下告臣也嗣股肱謂

手足繼作也。純專一也。言專力稼穡奔走勤勞。以事父兄。肇啓行也。車牛以載貨。服賈事商賈也。此皆資生營業之事。與酒酒相反者也。耕田貿易以孝養父母。父母有慶如歲時伏臘嘉禮稱觴之類。子弟親自洗以爲潔。腴以爲豐。致用酒。是乃子弟勤儉孝友以奉其親也。典聽常聽不忘也。大克羞者。大行養老之禮也。惟君惟國君也。人臣高年有德。君問道乞言。饋食醕爵。醉飽所以大養爾。惟曰爾老成多識。遠能觀省。作稽考中德。爾尚能爲仁人孝子。能進食祭祀。爾乃介此得飲酒安逸。丕大也。介猶因也。此乃信爲王

家正事模範之臣茲亦惟天順我以元老大德王家
所永不可忘者是當養之以酒也

王曰封我西土棐徂邦君御事小子尚克用文王教不
腆于酒故我至于今克受殷之命

三告也棐徂非遠也言文王儀刑近也腆厚也沈湎
之意武王以不腆于酒而受殷命聖人非誑語觀幽
王將亡詩人作頌弁曰樂酒今夕君子維宴衛武公
作賓之初筵魚藻瓠葉皆刺幽王腆于酒也子孫旣
以飲酒亡祖考以不飲酒興復何疑士君子不敢崇
飲之心何心小人宴樂好飲之心又何心存亡之介

學者反觀自得矣

王曰封我聞惟曰在昔殷先哲王迪畏天顯小民經德秉哲自成湯咸至于帝乙成王畏相惟御事厥棐有恭不敢自暇自逸矧曰其敢崇飲越在外服侯甸男衛邦伯越在內服百僚庶尹惟亞惟服宗工越百姓里居罔敢湏于酒不惟不敢亦不暇惟助成王德顯越尹人祇辟我聞亦惟曰在今後嗣王酣身厥命罔顯于民祇保越怨不易誕惟厥縱淫泆于非彝用燕喪威儀民罔不盡陳傷心惟荒腴于酒不惟自息乃逸厥心疾很不克畏死辜在商邑越殷國滅無罹弗惟德馨香祀登聞于

天誕惟民怨庶羣自酒腥聞在上故天降喪于殷罔愛于殷惟逸天非虐惟民自速辜

四告也又引殷事勸戒之殷先哲王湯也迪畏迪行敬畏也天顯小民言天道顯明在小民也經德行有常也秉哲志不昏也此言能畏民也成王畏相言能成王道畏輔相如湯于伊尹高宗于傳說惟恐治事匪有恭敬不敢暇逸況敢崇尚飲酒乎此言能畏臣也是以外服侯伯內服百僚正次宗官下及百姓里居皆化上之德不敢沈湎于酒且亦無暇時可終上欲助天子顯明其德下助官長敬事天子此殷先王

不飲酒之效也。後嗣王紂也。酣身酣飲身先也。命人
昏亂罔顯于民。祇以保聚民怨。不肯改易。蠱痛也。至
于民痛傷心。猶不自止其放逸也。其心疾很而不畏
死。罪在商邑滅亡而不憂。羅皆腆于酒者之情狀也。
無明德馨香祭祀。升聞于天。乃惟民怨與羣小及身
酣腥穢之氣。上聞故天亡殷而不愛殷。惟放逸之故。
豈天虐之人自取罪耳。此殷後王崇飲之禍也。

王曰。封。予不惟若茲多誥。古人有言曰。人無於水監。當
於民監。今惟殷隆厥命。我其可不大監撫于時。予惟曰。
汝劼轉。愆殷獻臣。侯甸男衛矧。太史友。內史友。越獻臣。

百宗工矧惟爾事服休服采矧惟若疇圻祈父甫薄違
農父若保宏父定辟矧汝剛制于酒厥或誥曰羣飲汝
勿佚盡執拘以歸于周予其殺又惟殷之迪諸臣惟工
乃湎于酒勿庸殺之姑惟教之有斯明享乃不用我教
辭惟我一人弗恤弗蠲乃事時同于殺

五告也言予非徒爲此多告而引湯與紂之事乃所
以爲監也惟欲汝協力戒勉殷之賢臣侯甸男衛之
君矧皆有太史內史爲友以相箴規及賢臣百官輔
導矧惟爾牧伯之事惟服行休美以從事不在暴虐
妄殺也服行也采事也若疇猶若屬也矧惟若屬有

司馬爲圻父以驅逐違背有司徒爲農父以順保民有司空爲宏父以定君皆可相助爲理矧汝但正已率屬剛正斷制于酒人豈有不化者不能身教而輕率用刑過聽人言或有告羣飲者教汝勿縱佚盡執拘係以歸于周予其殺之乎又思惟此屬乃殷紂所導迪之諸臣工上失其教乃湎于酒勿用殺之姑惟教之可也以禮厚下曰享既有斯明享殷臣乃有不用我教辭不體恤上之德意不蠲除已之舊事者我雖不殺是乃自同于殺矣觀于此言聖人之不貴刑殺如此

王曰封汝典聽朕恭勿辯乃司民酒于酒

六告也言汝爲牧伯常記我之恭戒勿聽小人辯言
易乃官守方今民沈湎于酒不可不慮也辯者必曰
酒民所常需申命誥戒何若是瑣瑣也夫物有養而
爲毒小而害大者莫如酒明者以爲當戒庸衆人以
爲不必戒天下明者少而庸衆人多言法便者少而
言法不便者多民方昏淫多言亂聽是教之不信也
聖人灼見理亂之源似緩而實切辯言亂政不可聽
故曰勿辯昔魯定公問一言喪邦有諸孔子對曰言
不可以若是其幾人之言曰惟予言而莫之違不

于一言而喪邦乎酒之流禍也幾乎以天下喪也羣
飲之同于殺也幾乎可殺也故曰知幾其神桀未生
而禹先疏儀狄幽王未生而周公先作酒誥衆人見
已然不見將然惟聖人知幾故曰勿辯守而勿失至
于此而後見也不然聖人豈不近人情者哉後世不
達誥戒之意用不情之法禁私釀摧酒酤因以爲利
而曰禁民飲雖殺之不從矣善乎蘇軾有言曰甲筓
子責之學也故其子服乙筓子而奪之食故其子不
服此周公所以能禁酒而後世不能禁也

梓材

此亦周公爲武王言訓康叔也篇中有若作梓材之語因以命篇梓美材寓愛養成就之意聖人設官分職創制垂訓所以愛養天下而征伐刑獄非其本願司寇明刑惟以弼教方伯監視惟以裕民首篇戒慎刑明設官之意次篇戒崇飲革沈湎之俗此篇戒刻厲培忠厚之基古語淵懿讀者因疑爲錯簡今繹其義圓婉周匝其孰爲錯簡乎

王曰封以厥庶民暨厥臣達大家以厥臣達王惟邦君汝若恆越曰我有師師司徒司馬司空尹旅曰予罔厲

殺人亦厥君先敬勞肆徂厥敬勞肆往姦宄殺人歷人
宥肆亦見厥君事戕敗人宥王啟監厥亂爲民曰無胥
戕無胥虐至于敬寡至于屬婦合由以容王其效邦君
越御事厥命曷以引養引活自古王若茲監罔攸辟

亦爲武王言也將教康叔以恬養和懌爲政先言爲
邦君者可以無爲而治也大家大臣之家邦君之下
惟大家邦君之上惟王蓋尊爲天子上無可以自達
卑爲臣民下無可以自代唯邦君有王以專其責于
上而下惟稟其成有臣民以分其事于下而上惟通
其意故可以無爲而治也今汝爲邦君苟常自念曰

我有上下相師師司徒農父若保司馬折父薄違司
空宏父定辟及尹正衆旅何憂不治予欲無虐殺人
乎惟其爲君先恭敬勸勞耳遂往恭敬勸勞其民遂
于姦宄謀殺人者知見過歷者皆從寬宥其臣司徒
司馬輩見君行事遂于戕敗人如姦宄等者亦從寬
宥而國家無厲殺之政矣此惟邦君爲能然今王開
置監司其治爲民亦欲無相戕賊虐害愛養調護至
于敬其貧寡矜其婦女合人同由以相容保王其亦
欲如邦君之于司馬司徒御事罔厲殺人之命曰曷
以長養長安亦無厲殺人乎是亦在邦君而已蓋以

厥臣民達大家達王惟邦君故自古哲王能如此命者其監亦惟身先敬勞正已率屬達王而已何用刑辟爲

惟曰若稽田既勤敷菑惟其陳修爲厥疆畎若作室家既勤垣墉惟其塗墍茨若作梓材既勤樸斲惟其塗丹

隳

元入聲

惟曰者言立監之意非欲過求也是時武庚已殄奄徐已平東方已定惟在撫循安養勿復事煩擾紛更也稽治也敷菑徧布芟菑也陳修陳列修治也疆田畔也畎水道也卑曰垣高曰墉塗泥飾也墍墍通土

塼也累塹爲屋以泥塗飾也茨茅蓋屋也粗具曰樸
致巧曰斲塹采色有五朱曰丹如田旣敷菑室旣垣
墉器旣樸斲但當守其已成修飾潤色而已

今王惟曰先王旣勤用明德懷爲夾庶邦享句作兄弟
方來亦旣用明德后式典集庶邦丕享皇天旣付中國
民越厥疆土于先王肆王惟德用和懌先後迷民用懌
先王受命已若茲監惟曰欲至千萬年惟王子子孫孫
永保民

再申言立監之意先王文王也文王昔爲方伯旣勤
明德懷安夾輔庶邦庶邦來享作爲兄弟自遠方來

既又以明德爲后式用典刑安集天下庶邦大亨皆
明德懷集之效也今中原底定皇天既付中國之民
與其疆土皆先王明德之賜肆王今亦惟德用以和
悅先後迷惑之民亦用以悅懌先王所受之命如是
則民悅先王亦悅天心亦悅太平長世矣今爾爲監
亦惟曰千萬年王子子孫孫永保民耳他又何求蓋
康叔以司寇典刑爲伯監殷公感于管叔之死恐其
督責過急故梓材之言尤以仁厚屬之教康叔亦以
諷成王也

尚書辨解卷五終